

Me awhina enei take e te Poari i te mea hei painga mo te Arawa nui tonu e noho mai na i tena Marae i tena Marae. Ki te whakaaro me haere te awhina i te huarahi apiti mo te moni takoto a te Hapu o te Marae ara:

1. Mo te Whare Runanga hou me apiti e te Poari te moni takoto a te Marae i runga i te 10/- ma te Poari ki te 20/- ma te Marae engari kaua ta te Poari e nuku atu ite £200.
2. Mo te Whare Kai hou me pera ano.
3. Mo te Whare Noki. He mea tika kia whakaritea enei ahua Whare i otatou Marae kia pai ai te taha ki muri io tatou Marae. Te awhina ma te Poari kia 20/- mo te 20/- a te Marae engari kaua ta te Poari e nuku atu ite £75.
4. Wai Inu. He take nui rawa tenei a e tika ana kia whakawhiwhia nga Marae katoa ki te wai pai hei inu. Te awhina ma te Poari kia 20/- mo te 10/- a te Marae e ngari kaua ta te Poari e nuku atu ite £100.
5. Mo te Whare Karakia. Me awhina e te Poari o tatou Whare Karakia i runga i te 20/- ma te Poari ki te 20/- ma te Haahi engari kaua ta te Poari e nuku atu ite £200.
6. Era atu take o nga Marae, ara Taiepa inga Marae, whakatu rakau inga Marae, whakatu tangata hei tiaki i te Marae, whakaora inga Whare Runanga, Whare Kai me era Whare a te Iwi pena kua mate haere nga papa a pena ranei e tika ana kia peita tia.

Me awhina e te Poari ki te moni i runga i ta te Poari i whakarite ai.

Tera pea etahi Hapu kaore e kaha kite whakarite i te moni Kaupapa mo enei take kia tika ai te tapiri atu i te moni awhina a te Poari. Mo ena Hapu ma te Poari e whakarite etahi tikanga e rite ai te moni kaupapa i roto i etahi tau me ata whiriwhiri katahi ka nama ai e te Hapu i te Poari te moni kaupapa.

He mea pai tonu me tonu etahi Apiha o te Tari o te Ora kia haere ki nga Marae o te Arawa titiro ai inga waahi hapa o aua Marae katahi ka tuku Ripoata mai ai ki te Poari hei marama-tanga mo te Poari.

Hei whakatau i nga take katoa e pa ana ki tenei Wahanga whakaingoa ai taua Ropu ko te

KAUNIHERA O NGA MARAE O TE ARAWA

a ko taua Kaunihera te ringaringa whakahaere a te Poari i nga take katoa e pa ana ki tenei Wahanga.

WAHANGA TUARUA. MO NGA TAMARIKI KURA.

Kia £750 i te tau.

Koia nei nga tino taonga a te Arawa. Ko ratou hei pupuri i te ingoa o te Iwi Maori a nga ra e heke iho nei. Na reira e tika ana kia whakatakotoria etahi awhina ma tatou hei pou arahi i nga tamariki marama o te Arawa i roto i nga Kura ki nga taumata teitei o te Iwi Pakeha hei painga mo te Waka.